

—804 credimus, mansionem sibi inveniat. Quid illi congregationi prosperitatis deesse poterit, ubi ille est in medio, qui ait: 'Ubi sunt duo vel tres congregati in nomine meo, ibi sum in medio eorum'.

Pacem semper habete veram in caritate sancta, et oboedientiam sine murmuratione, et humilitatem sine simulatione, quae sunt maxime monachicae vitae virtutes, et Spiritui sancto amabiles ad habitandum in eis: atque erudite pueros et adolescentulos vestros¹ cum omni diligentia, in castitate et sanctitate, et disciplina ecclesiastica, ut digni habeantur vestrum post vos tenere locum, et pro vobis sanctis orationibus Deoque acceptabilibus assidua consuetudine intercedere.

Dominus Deus, qui vos in ovile sanctitatis congregavit, ipse numerum vestrum augere dignetur, et a dextris sibi in die iudicii stare concedat, ad audiendam amabilem sententiam, qua dicturus erit sanctis suis: 'Venite benedicti patris mei, percipite regnum, quod vobis paratum ab origine mundi'.

272.

Alcvinus monachos Montis-Olivi abbatemque Olomundum in familiaritatem recipit et ut pro fide catholica militent et in observantia regulari perseverent, hortatur.

—804.

Cod. H fol. 36'—38^a.

Edd. F 223, J 270. — Migne col. 503.

RELIGIOSIS FRATRIBUS, DEO ET SANCTO IOHANNI^b PRAECURSORI CHRISTI SERVIENTIBUS²,
HUMILIS SERVULUS EIUSDEM CHRISTI ET PRAECURSORIS EIUS ALCHVINUS^c SALUTEM.

Nam prima congregatio, quam Deo dispensante gubernandam accepi, beato Iohanni baptistae^d consecrata est³. Quapropter fas aestimo vos fratres agnoscere et commilitones, unum habentes dominum Deum, et unum patronum, cuius intercessio nostrum hinc inde numerum augere dignetur. Patrem vero vestrum Olomundum⁴ in Christo, et fratrem nostrum in caritate, familiari pietate accepimus, quasi unius familiae germanum et unius domini cultorem et unius protectoris conservum; et in eo ipso vos omnes recipiens quasi fratres carissimos, deprecans, ut me meosque per eius manus familiariter in sanctas orationes vestras recipere dignemini. Optime enim scitis, quanta est verae caritatis communio, quae absentes corpore praesentes efficit in spiritu. Nihil vero nocet absentia corporalis, ubi est praesentia spiritalis.

Vos vero filii, fratres et patres, in Christi clementia deprecor, unanimes estote in fide catholica, idem sapientes, idem volentes; firmiter permanentes in loco certaminis vestri, nil tela antiqui hostis metuentes, communibus^e manibus pugnate contra eum. Melius in acie cum pluribus pugnat miles, quam si solus foris inveniat in campo. Campum vero dico saeculi latitudinem. Quid vero vobis cum saeculari consuetudine? Christum elegistis, Christo certare vosmetipsos constrinxistis, perseverantes in agone regularis vitae. Nil vobis durum videatur in mandatis Dei; spe perpetuae remunerationis consolamini, scientes, quod non coronatur, nisi qui legitime^f certat.

272. ^a) Lemma: Ad fratres in ecclesia beati Iohannis baptistae deservientibus H.^b) Iohanne praecursore H. ^c) Alchuiñ H. ^d) Iohanne baptista H. ^e) communis H. ^f) legitime H.

1) Cf. supra litteras (117) ad eosdem datas p. 172. 2) Monasterii Montis Olivi sancto Iohanni dedicati (Montolieu). 3) Nescio quam dicat. 4) Olomundum abbatem Carolo rege monasterium Malasti in territorio Carcassensi super Duranum fluvium construxisse charta Ludovici Pii a. 815. nos docet (Mühlbacher Reg. n. 580). Meminit eius Theodulfus in versibus ad monachos S. Benedicti (Poet. Carol. I, 522): Atala te videat, dicque Olemunde vale.